



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL

Komunikadu Imprensa

Periodu : Jullu 2011

Edisaun : 8 Jullu 2011

JSMP realiza semináriu ba estudante Ensinu Sekundáriu Katólíka Santo Antonio Manatuto

Iha loron 06 fulan Jullu 2011, JSMP liu husi Unidade Justisa ba Feto, realiza semináriu ba estudantes sira iha Ensinu Sekundáriu Katólíka Santo Antonio Manatuto. Semináriu ne'e ho tema "*perspetiva jéneru iha Direitu penál no Prosesu penál*". Aliende matéria sira ne'e, esplika mós matéria konabá Lei Kóntra Violénsia Doméstika, inklui situasaun sistema judisiáriu TimórLéste nian.

Partisipantes iha semináriu ida ne'e, hamutuk estudante nain 57 ho kompozisaun, feto nain 36 no mane hamutuk ema nain 21.

Diretór JSMP, Luis de Oliveira Sampaio, haktuir katak "*programa semináriu ne'e hanesan kontinuasaun husi semináriu sira ne'ebé mak hala'ó ona iha tinan sira ba kotuk ho objetivu atu hasa'e estudantes sira nia kuñesimentu konabá lei aplikavel, nomós iha parte seluk, atu enkoraza mós estudante sira, liu-liu estudante feto sira atu hili Faculdade Direito, wainhira remata sira nia estudu iha Ensinu Sekundáriu*".

JSMP hein katak ho esforsu hirak nee' bele enkoraza estudantes hirak ne'e atu hili Faculdade Direito no wainhira remata sira nia estudu iha universidade, sira bele kompete iha Sentru Formasaun Judisiáriu hodi sai autór judisiáriu, nune'é bele asegura balansu jéneru nomós kompleta rekursus umanus iha setór justisa, hodi garante prosesu kazu sira iha tribunál ho efetividade".

Diretór Ensinu Sekundáriu Santo Antonio Manatuto iha ninia intervensaun, wainhira halo abertura ba semináriu ida ne'e, haktuir katak "*hodi estrutura tomak nia naran, agradese ba JSMP ne'ebé mak bele disponivel no hili Ensinu Sekundáriu Katólíka Santo Antonio Manatuto hodi fahe informasaun konabá lei nomós konabá situasaun sistema judisiáriu iha TimórLéste, hodi nune'é estudante sira bele kuñese ita nia kuadru legál sira ne'ebé mak aplika*".

Durante prosesu semináriu, JSMP nota katak estudantes sira ne'ebé mak partisipa semináriu ne'e, iha antusiasmu maka'as no ativu iha sesaun diskusaun.. Aliende ne'e, sira mós promete

katak depois semináriu ida ne'e, sira sei fahe informasaun hirak ne'e ba sira nia maluk estudantes sira ne'ebé mak la hetan oportunidade hodi partisipa iha semináriu ne'e, hodi nune'é sira mós bele informadu konabá matéria hirak ne'ebé mak ható'ó iha semináriu ne'e.

Programa semináriu ne'e realiza tanbá hetan apoiu finanseiru husi *The Royal Norwegian Emabassy* iha Jakarta.

Atu hetan informasaun kle'an, favor kontaktu;

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org

Landline: 3323883/7295795